



Uoči Sajma gospodarstva

Mostar centar regiona

Došli premijer i novoizabrani predsjednik Srbije Aleksandar Vučić, premijer Hrvatske Andrej Plenković, predsjednik Crne Gore Filip Vujanović...
 ● Nakon niza međusobnih susreta tokom popodneva, regionalni lideri sinoć su imali zajedničku večeru u restoranu „Romanca“

Uoči današnjeg otvaranja 20. međunarodnog sajma gospodarstva, Mostar je jučer bio centar susreta regionalnih lidera. U grad na Neretvi došli su premijer i novoizabrani predsjednik Srbije Aleksandar Vučić, premijer Hrvatske Andrej Plenković, predsjednik Crne Gore Filip Vujanović, članovi Predsjedništva BiH, entitetski predsjednici... Njih je dočekao hrvatski član Predsjedništva BiH Dragan Čović.

Evropski put

Nakon niza međusobnih susreta tokom popodneva, lideri su sinoć imali zajedničku večeru u restoranu „Romanca“, na kojoj su razgovarali o brojnim temama i izazovima pred kojima se nalazi region.

Čović je nakon sastanka novinarima izjavio kako mu se čini da su tokom razgovora dotakli suštinu problema, a to je „da BiH mora ostati država na evropskom putu s euroatlantskom budućnosti i unutarjom stabilnosti“.

- Kriza koju danas imamo, možda je neki potcjenjuju,

većina u EU je ne razumije, upozorava nas da mi u BiH i naše susjedstvo moramo znati da je stabilnost BiH stabilnost čitave jugoistočne Evrope - naglasio je Čović.

Podvukao je da se priča o izbornom zakonodavstvu mora riješiti u naredna dva mjeseca. Plenković je iznio da se otvoreno razgovaralo o ključnim temama za BiH. Podsjetio je na to da je Hrvatska najveći zagovornik i podupiratelj evropskog puta BiH, njene funkciona-

lnosti i jednakopravnosti triju konstitutivnih naroda, posebno, kazao je, hrvatskog naroda, kao najmalobrojnijeg.

Srednje rješenje

Poručio je da je inicijativa za izmjenu Izbornog zakona, s njegovog aspekta kao predsjednika Vlade Hrvatske, racionalna, normalna i nužna. Potcrtao je da bi pravodobno usvajanje predloženih izmjena osiguralo, prije svega, miran rad insti-

tucija „u ovom vremenu koje je sada na dnevnom redu“.

Izetbegović je kazao da je razgovor bio iskren i otvoren o tome kako „popraviti stvari, postići povjerenje u BiH“.

- Svi su svjesni toga da treba napraviti sa svake strane po neki korak, ka nekom srednjem rješenju, te stabilizirati prilike u BiH i na Balkanu - izjavio je Izetbegović.

M. SMAJKIĆ
- M. HODŽIĆ



S večere: Stabilnost i sigurnost u fokusu



Jake mjere osiguranja

Dolazak regionalnih lidera u Mostar proteklo je uz neviđene mjere osiguranja. Grad je u popodnevnom satima doslovno bio u saobraćajnom kolapsu.

Direkcija za koordinaciju policijskih tijela BiH, radi planiranja i realizacije poslova iz nadležnosti na fizičkoj i tehničkoj zaštiti

stranih delegacija i domaćih učesnika koji se posebno štite, provodi operativnu akciju pod nazivom „Mostarski sajam 2017“. Osim Direkcije, u ovoj akciji učestvuju i Granična policija BiH, Obavještajno-sigurnosna agencija BiH, **SIPA**, entitetski i kantonalni MUP-ovi...

Ribljī meni

Kako smo saznali, za predjelo su visokim zvanicama služili salatu od hobotnice i pržene lignje uz fokaču, dok je za glavno jelo bilo file lubina u umaku od bijelog vina uz domaću pogaču. Pili su vino, i to žilavku „barik“ te blatinu „grand cru“, dok je desert bio voćni kolač i tiramisu.

Ivanić se susreo sa Vučićem

Ključni izazov je na bošnjačkim liderima

Predsjedavajući Predsjedništva BiH Mladen Ivanić razgovarao je sinoć u Mostaru s premijerom Srbije Aleksandrom Vučićem o aktu- elnoj političkoj i ekonomskoj situaciji. Razgovaralo se o zajedničkim projektima za naredni period, s posebnim naglaskom na infrastrukturne projekte.

Ivanić je novinarima kazao da je s Vučićem razgovarao o odnosima između BiH i Srbije.

- Mislim da se na tom planu moraju napraviti ozbiljniji iskoraci. Ključni izazov je na bošnjačkim liderima, koji trebaju da kažu jesu li za



Ivanić i Vučić: Infrastrukturni projekti

to ili nisu. Ne vidim da je iz Srbije nešto loše urađeno posljednjih godina. Imamo dobru šansu nakon pobjede Vučića da se to riješi. O tome smo najviše razgovarali - naveo je Ivanić.